

## Veur Volk en Vaderland ?

Op de verjöördag van onze eudige *koning Willem Alexander*, 27 april, wieren ier en döör ook 't *Wilhelmus* ezungen. En a-j geluk ebben bint ter ook nog enkelen die 't eerste couplettien, *zo zij zich niet skamen veur de umstanders*, al elemaole kunnen mèezingen. Met 't twiede (= 6<sup>e</sup>) couplettien giet 't al eel gauw de mist in.



Aover de tekst is ter al sinds 't gebruik gesteggel ewest umdät ter altied wel individuen bint die vinnen der een mening aover te mutten gèven. En gelukkig maggen dät dan ook in Nederland, maer 't is dan wel verdulde jammer dät men ook altied maer *'t geliek ebben* naor zich toe willen alen. Maer a-j al niet ies meer trots wilt wèen op oew ofkomst of vaderland mu-j oe is ofvraogen . . wöörop dan wel?

*Börgemeester Henk Jan Meijer* gaven um 12.00 uur vanof 't podium op de *Ni'je Märkt* 't stärtsein van de Koningsdagviering in Zwolle en döör is nao de vlagceremonie 't Wilhelmus ook ezungen. En dan vallen 't een grupien Amerikaanse toeristen, *döörbi'j anwèzig*, gewoon op dät ter maer zo weinig wier mèè-ezungen . . . jao . . die bint 't wel gewend te doen.

't *Wilhelmus* . . . . is ien van de oldste volksliederen die bestiet aloewel 't **pas in 1932** töt **nationaal volkslied** veur Nederland is ewörren.

Veurdien adden wi'j " *Wien Neerlandsch bloed deur de aderen vloeit* " as volkslied. Oe zat dät dan in mekaere?


't Wilhelmus is een Geuzenlied dät an 't begun van de *opstand in 1570*, tegen de Spaanse bezetter tiedens de *80 jörige oorlog* is ontstaon en *Willem van Oranje* as symbool van 't verzet tegen de Spaanse aover-eersink wier ezien.

Umdät begun 1800 't Wilhelmus nog veural as een *peti'jlied veur de Oranjegezinden* wier beskouwd wazzen 't as nationaal volkslied ongeskikt eacht en wier der in 1817 nao een priesvraoge " *Wien Neerlandsch bloed deur de aderen vloeit* " töt 't nationale volkslied eközen.



Opvallend wazzen wel dät *Koneginne Wilhelmina* bi'j aer in-uldigink in 1898 't Wilhelmus ef laoten spöllen in plase van 't nationale volkslied.

De veurkeur vanuut 't koningsuus veur 't Wilhelmus veroorzaken verwaerink en ef ter uutendelijk toe eleid dät de ministerraod op **10 mei 1932** deed besluten 't Wilhelmus töt officieël nationaal volkslied te verklören.



En oewel de meesten al meute ebben met twee coupletties . . . ku-j wel naogaon dät 't elemaole mis zollen gaon as wi'j alle *veftien coupletten* zollen mutten zingen. Toch is dät now net wat op koningsdag bi'j *Cultuurskip THOR* wel gebeuren.



*Eric Milton*, wollen met begeleiding van *Rik Elings* (piano) en *Isabelle Doodhagen* (viool) 't ge-ele *Wilhelmus*, *dus alle vief-tien verzen*, aover de *Thörbecke grachte* laoten skallen.



ler mos ik netuurlijk uut pure ni'jskierig-eid, naor wat ter in Zwolle gebeuren, èven gaon kieke . . . Gelukkig veur Erik, Rik en Isabelle, wazzen der nog wel wat Zwollenaeren op of ekommen, maer ik kanne elaaas niet zègen dát 't zwàrt zaggen van 't volk.



Toch ad ik wel weer wat te kieke. Want ook al stao-j op de dak van de roef . . . skief is 't wel. Eric en Isabelle stonnen en dan kan 't lichem zichzels wel corrigeren en as 't waere toch rechtop staon, maer Ric zatten op 't pianokrukkien.

As de piano èvenwiedig skief stiet met 't roefdak, dan zitten ie ook skief. De rugge giet dät dan weer corrigeren maer 't eufd wil weer de bladmuziek recht lèzen en stiet ter dan weer anders op de romp . . . mens toen ik dät zo anzagge . . deed mi'j de rugge al zeer.



*Ex lid van 't Körps Mariniers . . Eric Milton* brachen 't Wilhelmus met aovergave en gong op in de tekst. IJ stonnen als 't waere as *Willem van Oranje* zien eigen geskiedenis te zingen.

As 16<sup>e</sup> vers wier de eerste weer eraeld en moggen de anwèzigen èven mèezingen.

Het wazzen veur mi'j best wel weer is een andere ervarink . . . Ik kanne mi'j niet erinneren 't ooit eerder te ebben e-eurd. Dus disse bin-k dan weer rieker. Veur de zekereid e-k ook maer is èven de ge-ele tekst van 't Wilhelmus vanof de site van het koninklijkhuus eplukt . . . 't is now ienmaol "*Ons*" volkslied. . . wat o-j ook van elke letter in de tekst maggen vinnen. En a-j strakkies met 4 en of 5 mei 't Wilhelmus weer is euren . . . kan 't oe skèlen wat de ander döt? . . gewoon mèèdoen . . ie ebben toch ook nog oew eigen trots?

*Oorlogsgeweld ef altied nog slachtoffers emaaft . . . zij die vielen, zo wörren beweerd, veur volk en vaderland . . . maer nog meer . . . veur onze vrij-eid !*



*Ook de vrij-eid van ons volkslied maggen wij deurgèven !*

1 mei 2018

